



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Tribunál Distritál Baucau
04 Setembru 2014

Kazu violénsia doméstika 11 hosi total kazu 13 julga liuhosi julgamentu movél iha Distritu Manatuto

Iha 25 to'o 29 Agostu 2014, Tribunál Distritál Baucau realiza julgamentu movel iha Distritu Manatuto. Tribunál movel ne'e julga kazu 13 no kazu 11 mak nu'udar krime ho natureza violénsia doméstika, enkuantu kazu 2 seluk involve krime abuzu podér ho kondusaun perigoza. Maske nune'e, tribunál so julga deit kazu 12 no kazu violénsia doméstika 1 adia tanba arguidu la marka prezensa.

Entre kazu ne'ebé julga, tribunál konklui ona kazu 9 ne'ebé involve violénsia doméstika ho suspensaun ba pena prizaun. Kazu 1 tribunál altera akuzasaun husi krime ofensa ba integridade fizika simples husi artigu 145 Kódigu Penál ba krime maus tratus ba kónjuje tuir artigu 154 Kódigu Penál. Leitura akordaun ba kazu maus tratus ba kónjuje agenda fali ba iha 03 Setembru 2014, iha Tribunál Distritál Baucau.

“JSMP apresia inisitiva hot-hotu atu hakbesik justisa ba povu iha área rural sira, atraves hosi julgamentu movel hodi fasilita justisa asesivel ba comunidade no diminui kazu pendentes sira. Mesmu nune'e JSMP enkoraza tribunál sira atu eskolla sentensa ne'ebé iha kbi'it atu evita krime hanesan akontese iha futuro,” dehan Diretór Ezekutivu JSMP, Luis de Oliveira Sampaio.

JSMP observa katak tantu iha tribunál movel ka tribunál distrital sira, maioria kazu ne'ebé julga iha tribunál sira ne'e involve kazu violénsia doméstika. JSMP diskonfia katak dalaruma sosiedade latauk hodi komete krime, tanba sentensa ne'ebé durante ne'e aplika ba kazu violénsia doméstika sira la sériu no arguidu sira la hanoin katak sira hetan kastigu kuandu sira simu pena suspensaun. JSMP rekomenda ba tribunál sira atu avalia fali kualker sentensa sira ne'ebé aplika ba kazu violénsia doméstika.

Julgamentu movel ne'e prezide husi juis Dr. Antonio Fonseca, ministériu públiku representa husi Dr. Luis Hernani Rangel da Cruz no defensoria públiku representa husi Dr. Grigorio de Lima.

Programa julgamentu movel ne'e realiza tanba hetan apoia husi UNDP.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaune-mail: luis@jsmp.minihub.org

info@jsmp.minihub.org

Telefone:3323883 | 77295795

Website: www.jsmp.tl

Face book: www.facebook.com/timorleste.jsmp

Twitter: @JSMPTl